

Arubanonan "Campeonnan mundial" di vota

Nunca mi ta bisa ningun hende pa kende mi a vota. Mi a lanta cu mayornan di PPA, despues mi tambe a vota PPA, y despues mi a bira Petronista. Despues di Petronista, mi a vota pa candidato di diferente otro partido, y no a keda ciegame cu un partido. Prome cu mi marca e circulo, mi ta pensami bon. Nunca mi a equivoca pasobra mi a vota "corecto" segun mi consenshi, si mi candidato a wordo eligi of no. Un cos cu semper mi kier a haci tabata pa puntra hende pakico nan kier vota. Mi a haci esaki ultimo tempo, y a haya contestanan di "regenboog" y remarcable ta cu Masha hopi tabata relaciona cu "interes". Mi a dicidi di publica aki algun di esnan mas "colorido" a pesar cu tabata tin algun cu tabata hopi bon pensa.

VOTO SEGUN INTERES PERSONAL

"Mi ta vota pa partido "Chogogo" pasobra den nos familia, mi abuelonan y mayornan semper a vota pa "Chogogo" y mi ta sigui nan tradicion."
(Bo no tin cunes si nan por goberna of no)— "Mi no ta cambia partido!"

"Sr. Cadeshi Tunaman, a duna mi ruman trabao. Tur campaña e ta pone bandera na nos cas y regala nos T-shirt. E sa paga awa y coriente pa nos tambe den campaña, y nos no ta lague cay".
(No ta importa si el a traha bon como parlamentario o ministro, ni si su partido a traha malo)

"E ta nos candidato y nos ta cu su partido!"
"Bula riba cay abao, mi ta keda cu partido "Slogobel". Nan perde of gana, mi no ta keda sin apoya nan. Mira cuanto borchí y bandera nan tin caba, y ademas, ata nan candidato Maria Elena a compra un frigidaire pa nos".
(Bo voto ta bendi pa un frigidaire?) "El a paga tambe 250 florin pa nos pone su borchí na cas".

"Nos henter familia ta cu partido "Bringamosa". "Nan por ta subi baha, pero ta nan a percursu cu tin caminda asfalta ta core dilanti nos cas".
(bo no sa cu e caminda asfalta ta nan deber y ta cu bo mes placa di belasting nan ta cubri e gasto?) "Ta hopi aña nos a biba cu caminda santo yenando stof den cas prome cu a yega asina leu y pesey ultimo 3 eleccionnan ta cu "Bringamosa" nos ta".

"Danki na ministro "Kinesia" mi tata a haya pension y no mester traha cu e edad halto cu e tin, pesey nos ta vota pe y su partido "Purgafierno". (Bo tata a haya pension pasobra el a yega edad pa haya pension, y tin derecho riba dje)
"Ministro Kinesia a percursu pa mi mama tambe haya su pension". (Esey ta pa motibo cu bo mama tambe a yega edad di ricibi su pension). Ta e ministro a regla e asunto aki pa nos y cu nos a bay SVB pa atende cu documentonan."

"Si no tabata pa parlamentario "Cocoliso" y partido "Tuneshi" awe mi no tin e cas di pueblo aki. Nos ta vota pe atrobe, pasobra el a papia cu ministro "Sankochi" pa nos a haya e preferencia aki. Ta cu "Tuneshi" nos ta y lo keda."

"Bringamosa a kita tereno di mi tata (Pasobra el a haya e tereno erfpacht y keda 15 aña sin use) "Nos kier a use pa construi nos cas y a perde" (pasobra e tereno tabata pa planta y usa como cunucu, y no pa traha cas). "Ta cos di sinverguenza contra Arubano, pasobra awe ta 3 latino tin cas traha riba dje, danki na partido "Slogobel".

"Tur eleccion partido "Purgafierno" ta paga nos 500 pa pone borchí y bandera y e biaha aki ta paga 800 florin y tambe 50 florin di gasoline pa cada parada di candidato y di partido.

(Ora cu 800 florin caba na bingo y casino, y gasoline caba despues di parada, candidato Ros-Angela, ta pone pan riba mesa e 4 añanan cu ta sigui?)
Te ainda despues di eleccion nos no tabata tin mester di Rosangela.

ESNAN CU TA PENSA POCO MAS

"Mi ta vota pa partido "Tuneshi" pasobra partido "Slogobel" ta mucho corumpi y ta traha pa stranhero so. "Unda negoshinan di arubanonan ta awe?"

"Nos a baha partido "Purgafierno" pasobra nan a laga mucho stranhero drenta Aruba lanta negoshinan, y no tin arubanonan ta traha den nan. Pero partido "Tuneshi" a haci mescos y cos a bira peor. (Bo ta vota riba otro partido e biaha aki?) "No, mi ta keda cu "Tuneshi" of cu "Purgafierno" pasobra nan ta esnan mas grandi. E chiquitonan no por haci nada. (Con bo sa esey?) "Nan no tin placa! Ni bandera ni borchí nan no tin, corda T-shirt".

"E aña aki mi ta bay cu partido di e Piscador. Nan no tin hende haragan manera e otro nan. Mi primo cu ta toca guitarra ta bay pa ministro di turismo, y mi amigo cu ta dealer di casino di "Yankiegai" ta riba lista pa cultura. (Bo ta sigur cu nan ta califica pa trabao di ministro o parlamentario?) "Ta mi hende nan ta! Cu nan mi familia mester ta!"

"Pa partido "Chogogo" mi no ta vota. Mi sobrino a bay riba e lista aki como candidato y a traiciona nos familia. Semper nos a vota pa partido "Bringamosa", pasobra eyden nos tabata tin hende di nos familia. Pero cu "Chogogo" nunca!" (Boso ta vota pa familia riba lista y bo sobrino no ta familia mas?) E ta bon studia y por ocupa tur puesto di ministro of di parlamentario pero "Chogogo" nunca a yuda nos cu nada. (Bringamosa si?) Danki na mi familia den Bringamosa awe nos tin negoshi, SUV di 60 mil florin, y varios cas. Ta e candidatonan familia den Bringamosa, a yuda nos. Nos tin 14 trahador, y 4 di nan ta arubano."

E OTRO PENSAMIENTO

Si bay tras di e pensamentonan aki, bo ta puntra bo mes, ki dia e pensamiento "tradicional" arubano relaciona cu eleccion ta cambia?

Ta pa cos nos ta vota? Ta pa "ami, ami y amil" nos ta vota?" Interes di Aruba ta keda un banda na momento di vota y eligi e representantenan cu mester goberna nos isla? Partidonan ta saca programa di gobernacion por nada? E programa ta conta solamente pa aki 4 aña nos piki riba dje, segun nos interesnan of interesnan di familia? Cerca hopi votador, mi ta nota cu bienestar di Aruba no ta conta pa nan.

hopi hende ta keda mucho ciego cu un partido, sea cu nan a goberna bon of no a goberna bon. Por a tende di hendenan cu ta cambia di partido pasobra nan a pensa bon prome cu nan a kibra nan "tradicion". Otronan ta cambia di partido grandi pa chiquito. Otronan ta mira algo den prome cinco di e partidonan nobo. Otronan ta keda cu e prome 10 nan di partidonan tradicional.

Pesey na e momento aki no por pronostica ainda cu e resultado di eleccion lo ta tal o tal.

Votacion tradicional ta duna MEP o AVP gobernacion. Votacion tradicional pensa bon, lo trece cune un Coalicion di AVP of MEP cu 1 of 2 otro partido.

Votacion corecto y manera mester ta, ta duna Aruba "e gobernacion cu Aruba a merece".

Juby Naar.

TIME OUT

Talk Show Deportivo cu CLARET LOPEZ

Time Out y ATV dunando un homenage special na nos seleccion di natacion special nos prome medayista di oro den CCCAN Micky van der Vaart y e hormigita Atomica Adrian Fraser. Softbol na Winston 7:15pm Madushi Stars vs Interprint 9:00pm Gess Power vs Blue Stars.

AWE

19 AUG.
PA 6:30 PM

15
AT

Kende ta bin pa weganan di reino?